



النص المسرحي

طلوات الله



تأليف
أحمد أبو سمره

إهداء

إلى كل فتاة نفسها فى العريس
ومش لقياه
إلى كل شاب تعصف به حالة العُطل العام
إلى قطر الندى
مصر العظيمة
إلى بناتى أمنية و شروق
إلى أولادى إبراهيم و يوسف
أتمنى لهم بكرة أجمل

أحمد أبو سمره

الشخصيات

- الراوى والراويہ ۰۰۰ شخصيات تفتح الحكاية وتذوب فى الممثلين
- قطر الندى ۰۰۰ ابنة خمارويه تاريخياً وفتاه مصريه تجسد الوطن الأنتى والانتى الوطن
- مصرى ۰۰۰ شاب عاشق لقطر الندى
- شوق ۰۰۰ شاهده على الحكاية
- خمارويه ۰۰۰ أبو قطر الندى ثم كل أب فى الروايه
- أبو الشوف ۰۰۰ مجذوب الحكاية
- طاهر ۰۰۰ شاب فقير
- بردائوش ۰۰۰ رجل عربى مسن يملك المال
- فلفل ۰۰۰ ابن بردائوش
- الشيخ أبو على ۰۰۰ رجل كفيف يملك ظرف المشايخ
- سيدوسع ۰۰۰ من أتباع فلفل
- زاهيه ۰۰ روايح ۰۰۰ نسوه من الشعب مع قطر الندى
- داهيه ۰۰۰ أمراه من الشعب مع وجهة النظر المخالفة
- عمار ۰۰۰ ابن بلد صديق الشيخ أبو على
- الجرف ۰۰۰ نموذج السيل الجارف لإهدار القيم
- فضل المحلل ۰۰۰ نموذج النفعى الذى يظهر عند الضرورة
- مجموعة شباب وفتيات تشارك فى الحكاية
- فرقہ الغناء حسب ظروف العرض
- الاغانى الموجودة فى النص من التراث السويسى وتدخل المؤلف باضافات تتماشى مع موضوع العرض ۰

- " تبدأ الفرقة فى الاستعداد للغناء حول الدائره ويدخل المطرب "
- المطرب (يغنى) الحنه يا حنه يا قطر الندى
- المجموعة " منشغله فى ترتيب نفسها و البعض يتحدث كلاً مع الآخر ولا يرد أحد "
- قائد الفرقة : إيه يا جماعه فيه إيه ما لكم ؟
- المجموعة : فيه إيه يا ريس ؟
- المطرب : ما تردوا
- فرد ١ : الأصول يا أستاذ إن حضرتك تنبهنا
- فرد ٢ : وتقول مستعدين وتتفق معانا
- قائد الفرقة : بتقول إيه يا خويا !
- فرد ٣ : أيوه نتفق الأول
- قائد الفرقة : فيه فرقة تراث فى الدنيا بتتفق ساعة الشغل أمال البروفات اللى عملناها كان ايه لزمتمها ؟
- فرد ٤ : يا أستاذ أى فرقة فى العالم ليها اشاره معينه تبدأ بيها
- قائد الفرقة : أمال ايه اللى حصل !
- فرد ٢ : المطرب بتاعك داخل غُنا منه لنفسه
- فرد ٣ : تصدق وتأمين بالله
- قائد الفرقة : أمنت بالله
- فرد ٢ : انك راجل قمع
- القائد : قمع ٠٠٠ مقلوب ولا معدول
- فرد ٤ : بيخر يا أستاذ
- فرد ١ : بيخر أيه انشاء الله
- المجموعة : بيخر نغم يا أستاذ
- قائد الفرقة : طب ياله يا جماعه عشان نغنى (يدخل الأول)
- الراوى : وأزاي يا أستاذ تبدأ و أنا غايب ؟
- قائد الفرقة : ما أنت طول عمرك غايب يا سيدى ، فيها ايه يعنى ؟
- الراويه : أعترض ٠٠٠ أنا أعترض على الكلام دا
- قائد الفرقة : ليه بقى يا أختى يا فلحوسه
- الراويه : لانه دا الغايب الحاضر
- قائد الفرقة : غايب حاضر مش فاهم
- الراوى : أنا اللى وسط الناس موجود بأحاساسى
- الراويه : يظهر فى وقت النداء ٠ فاكرو مش ناسى
- الراوى : بأحكى عن الحاصل
- الراويه : ويشد فى الاسماع
- الراوى : وبأروح بعيد خالص ٠٠٠ أرجع معايا الشوق
- الراويه : نبدأ يا ناس بالغنا ٠٠٠ تحلا الحكاوى نفوق
- قائد الفرقة : أبدأ يا أبنى

المطرب	: الحنه يا حنه يا حنه	يا قطر الندى
	يا شباك عريسنا يا عيني	جلا ب الهوى
	يا خوفى من أمك	لتدور عليك
	لأحطك فى عيني يا عيني	وأتكحل عليك
الفرقه	: الحنه يا حنه يا حنه	يا قطر الندى
المطرب	: يا خوفى من أمك	لتدور عليك
	لأحطك فى صدرى ياروحى	وأزرر عليك
	وإن جم يسألونى عن	ضحكة عينك
	راح أحلف وأقول يا حبيبي	ونكيد العدا
الفرقه	: الحنه يا حنه يا حنه	يا قطر الندى
الراوى	: جلا جلا جلا جلا	
الراويه	: اللعب أصبح فى الخلا	
الراوى	: من غير كلام بنقول كلام	
الراويه	: الكلمه تقطع فى الحقيقه تهزها وتخوف البوم والليلام	
شاب ١	: أفرد كلامك وأحسنه ٠٠٠ لسانا ناقصين فى العلام	
فتاه ١	: طب ليه كده تبدأ كلامك بالنكد !	
الراويه	: الكل لازم ينتشى ونحقق الفرجه التمام	
الراوى	: (يتجه الى الشاب) حاضر يا أخينا نعيد كمان ونشد فى قلوب الزمان	
	(يتجه الى الراويه) إيه فى الجراب قولى طلعي ٠٠٠ شرط إن	
	يا دندش تسمعى صوت الزمن دا مالوش حدود	
الراويه	: (تضحك) ما أحنا هنعكى عن الفرع	
شاب ٢	: وعروسة تفرح بالعريس	
فتاه ٣	: الكل يفرح أو يهيص	
الراوى	: الواد خميس فاتح قميصه للدفا ٠٠٠ بيلم كل الفرحانيين صبح الجُمع	
	وتقيد سراير بالدفا جوه البيوت	
الراويه	: ألفين عفا ع الصبحه لما تكون غسل	
الراوى	: إخى عليها لما يملأها الكسل ٠٠٠ الكلمه ليكى يا غنوتى ٠٠٠ طول	
	ليلى بأحلم بالنهار ٠٠ عش وعروسه ولقمه بتقوت جعان ربح قلبها	
شاب ٣	: أنا مصرى عاشق عشها وفداه نموت	
شوق	: أنا شوفت شوقه وهو باصص من بعيد وسمعت دقات قلبها	
شاب ٣	: قطر الندى	
شوق	: قطر الندى ٠٠٠٠ فى عينها بيطل النهار فرحان قوى مليان غُنا	
الكورس	: فى عينها بيطل النهار مليان غُنا	
شوق	: والتوب الأخضر طرحته زايته ٠٠٠ الجبين فلقة قمر	
الكورس	: فلقة قمر	
شوق	: تفرد اديها تجيب هناك ألفين صباح ٠٠٠ وتمد خطوه تبعت الخير	
	ع القلوب	

- الكورس : وتمد خطوه تبعت الخير ع القلوب
شوق : أوقات كثير بيحط فوق شباكها بوم أسود لئيم ٠٠٠ تفضل كما
المهره بتحرن ع الغريب وتطرده وتعود أمان
- الكورس : هى كما المهره بتحرن ع الغريب وتطرده
فتاه ٢ : أنا شوفتها شامخه كما شجر النخيل الشعر سايب ع الكتاف
يطرح بلح
- شوق : لو كنتى منها تقربى ٠٠٠ كانت تحطك جوه عينها وتحضنك
وتهدى قلبك تزرعه طهر وحنان (تتجه الى شاب)
فيه ايه جرا لك يا الجدع !
- شاب ٣ : أيوه يا خاله ٠٠٠ قصدانى أنا ؟
شوق : شيفاك مخبى فى فكرتك كام مسأله ٠٠٠ أسأل يا ولدى
عندى الاجابة
- شاب ٣ : الشوق فى عينها مختشى ٠٠٠ وواخده دايم ع البكا
فتاه ٣ : وأنا لما بأسمع حسها ٠٠ يملانى غيظ مين اللى جرح فى الخدود ؟
فتاه : (تشخص قطر الندى) مش هى دى ٠٠ المسأله ٠٠ أنت بتبعد
بالسؤال قرب وشوف وأنا لما أقولك شوف كلامى هأصدقك
ولا ها دارى
- شاب ٤ : ليه سيبتى مصرى ؟
قطر الندى : دا كان عيونى اللى بتلمع فى الحياه ٠٠٠ أنا عمرى يوم ما نسيت
هواه بس الحكايه مش بأيدى
- شاب ٣ : (يشخص مصرى) قطر الندى
قطر الندى : أبعد يا مصرى عن الحرس
مصرى : راح يعمل إيه يعنى الحرس ؟ وأنا م الحرس ٠٠
قطر الندى : طول عمرهم بالسيف يقطع فى الرقاب
مصرى : دا أحنأ أحباب مش جاى طمعان فى الولايه
قطر الندى : ما بيفهموش غير فى العقاب
مصرى : بأعشق عنيكى تفيض أمل ٠٠٠ وأنتى مسافره للمُحال
قطر الندى : علشان بقلبك مؤمنه بتحبنى
الكورس : مش واحده بس ٠٠ اللى بهواكى وأنفتن
كل القلوب الطيبه مليانه من عشقك عذاب
تيجى ديابه وتروح ديابه وأحنأ بحسبك مشغولين
- قطر الندى : عرفاهم أهلى الفلاحين
شاب ٤ : والصيادين والنجارين
فتاه ١ : والبمبوطيه ٠٠٠ حتى عمال الطحين
قطر الندى : مين عرفك يا مصرى قول مين عرفك ؟
مصرى : شايف الجمال فوقها الهدايا محمله ٠٠ ومنادى بيقول ع الخليفه
العريس

- قطر الندى : دا أحزنك ؟
- مصرى : ولا أى واحد فى البلد يرض بكده
- قطر الندى : عمرى ما كنت أحلم يا مصرى " تتجه اليه " إلا بهواك فبلاش تودعنى وقلبك ٠٠٠ ينزف الشوق ع الطريق
- شوق : فوق كل دا ٠٠٠ القلب عاشق ضحكك (يدخل الراوى فيعود الجميع الى الدائرة)
- الراوى : طبعاً يا ساده الحكايه ناقصه قول
- الراويه : إيه سكتك ؟ ما تيللا قول ٠٠ و أزرع بقى نبت الحكايه وعلى حسك للجميع
- الراوى : كانت حروب واخده فـ جرايرها الولاد
- الراويه : بين مين و مين ؟!
- الراوى : بين الخليفه المعتضد وخمارويه ٠٠٠ جيش الخليفه وانهزم
- الراويه : لا ما أنهزمش صحصح يا أخويا فى الكلام (تلكره)
- الراوى : أبن طولون اللى أنهزم وقدم الصهر النسب ويه الخليفه
- جمهور ١ : ٠٠٠ بس أنا أعرف إن خمارويه أرسل مراسيل للخليفه عشان ما يقبل بالنسب ويسيبه يحكم برنا
- الراوى : أنت أسمك إيه ؟
- جمهور ١ : أسمى ٠٠٠ (يذكر أسمه الحقيقى)
- الراوى : وسمعته فين
- جمهور ١ : فى المدرسة ٠٠ استاذ تاريخ هو اللى قال ومن الطبيعى أصدقه
- الراويه : الحكمه فى العلم يا عارف بالتاريخ انك تحقق فى اللى يتقال عن فلان
- الراوى : يعنى لابد وتدرسه وتشوف بدايته ومنتهاه
- جمهور ٢ : وانتم بتحكوا ٠٠ ولا فتحتوا المدرسة ٠ (ضحك جماعى)
- شوق : قلب البنية أما أنكسر ٠٠ نزفت دموع ٠٠٠ فاض الوجع على بر مصر والأرض بعد ما خضرت ٠٠٠ أسود لونها وأنطفئ
- قطر الندى : أهل السياسه والكياسه والعروش بيضحوا حتى بالكرامه ٠٠٠ عشان ما يفضلوا يحكموا ٠
- فتاه ١ : يعنى إيه ؟
- قطر الندى : يعنى مشاعرك تنطفئ زى الشموع اللى طفيتها فى حنتى
- الكورس : إيه كان حصل ؟!
- قطر الندى : " فى حالة من الشجن والألم " ٠٠٠ لفوا الصوانى بغنوتى فوقها الشموع طول الطريق فيه ناس بتخنق فى الألم من نظرتى
- الكورس : ومشيتى ليه ؟
- قطر الندى : ما كنتش أقدر ع الرجوع
- شاب ٤ : زفه جوارى فى سوق عبيد
- قطر الندى : الشمس نزفت فى السما كبدي عليها ٠٠ شلال مولع موكبى والضى

زاحف يمشى ويقولى بلاش (تصرخ) وأنا أنسى عمرى أزاى
وأخلع منبته

الفرقه (تغنى) : الحنه يا حنه يا حنه
فوق السكه شايب عمرى
كل الناس يغنوا وييكوا
الحنه يا حنه يا حنه
قطر الندى (تغنى) أمانه يا خلق عليكم
أسمر لون عيونه محبه
عشق رموش عيوني
الفرقه ٠٠٠٠ : الحنه يا حنه يا حنه
فوق السكه شايب عمرى
قطر الندى : بلغنى أيها الشعب الذهب
وأن البنيه ضحية حلم أبوها
شاب ٤ (يشخص خمارويه)

يا بنتى لازم تقبلى ٠٠٠ المسأله مش عايزه تعقيد أو خلل
قطر الندى : لما الخليفه المعتضد رضى بيه زوجه إيه التمن ؟!
خمارويه : أنتى يا جوهرة القصور راح تحفظى لى عرش مصر
قطر الندى : و إزاى بتعلن فى البلاد بدء الفرح
خمارويه : بنتى ولازم تفرحى ٠٠٠ بكفايه حزن ٠٠٠ أنا برضه قائد ليه شعب
والنسب مش عار
قطر الندى : العار يا ولدى إنك تأمن مجلسك ع العرش بيا
خمارويه : كنت أعمل إيه ٠٠ أفضل فى حرب !
قطر الندى : فيه العهود ٠٠٠ والصلح كان خير ع الجميع ٠٠٠
خمارويه : الناس غلابه (يتحرك فى اتجاه قطر الندى) من زمان يتمنوا فرح
الكورس : طول عمرنا وإحنا بنشرب فى المزار ٠٠٠ والقهر زايد ع الضهور
٠٠ إيه مهرها ؟

خمارويه (فى مواجهة الشعب) كان مهرها ليكم سلام ٠٠٠ الفلاحين للأرض ترجع
بالفيسان تبدر تفاوى الحب يطلع خير لبكره

قطر الندى : و أذفع أنا ثمن النهار
الكورس : قولى الحكايه وفضفضى كل الوجع
قطر الندى : أبدا منين ٠٠ ولا فين ٠٠٠ والشمس لما بتتشقق وسط الغمام إيه
اللى باقى من الكلام ٠٠ ويفيد بأيه ثانى الكلام

فتاه ٢ : سيبوا البنيه تقيد شموع المحزنه
قطر الندى : صدق كلامك يا البنيه المحزنه ٠٠٠ بنت فى عمرى يدوب يفتح
وردها وتشد حيلها للحياه ٠٠٠ شافت حليوه فى نظرتة قاد قلبها
عشق لهواه

مصرى : مصرى أنا فى الأسم والرسم النبيل ٠٠٠ فارس بيعشق ضحكك

لما تعاكسى فى القمر
 قطر الندى : " تجرى عليه " مخضوض وقلبك دقته فزعت قلوب فيه ايه حصل؟
 مصرى : أنا فرد واقف ع الجسور يحرس عنيكى... يا أخذ من النيل
 ضحكته لما يفيض وأغزلها ثوب يكسيكى نور واللى حصل يقتلنى
 وأشرب دمعنى
 قطر الندى : يا حُرقتى... أشهد يا صفصاف... هأطلبك... تحكى لحبيبي
 تعرفه نار العذاب... وتقوله مين كان فى الألم وحده الغريق...
 مصرى : قلبى البرىء داب م الوجع وبسهم جارج جرحوه
 قطر الندى : فين ابتسامتك يا جدع بيها هنقدر ع الحياه
 الراوى : قيموا الصلاه يا مؤمنين... قيموا الصلاه
 الراويه : جوه المعابد والمساجد والقلوب
 أبو الشوف : مكتوب تسنكر ضحكتك رحلة عذاب... جوه الرموش... الكحل
 مليون بالدموع... فوق الرموش فدان شراقى للحبيب... النجم
 سافر وأبتدا شغل الجوارى

المطرب والفرقه (يغنوا)

ياجارية أم الحبشيه يا شارية المال... يا شارية المال
 قومى إفرشى لعرسنا خليه ينام... خليه ينام
 فرشتلوا أيوه يا نينه زى ما قولتى... زى ما قولتى
 سبع مراتب قطن أبيض ولحافه ستان... ولحافه ستان
 قاعد على السلم ولا يتكلم... ولا يتكلم
 عاملى عمده ومعلم وحرامى خطاف... وحرامى خطاف
 مصرى : خطف عمر ك... خطف قلبك... خطف الاثنين
 وكل الخلق دى شاهدين من الأول (يشير الى الجمهور)
 قطر الندى : ساعات يا مصرى بأحلم بك ماسك قنديل
 مصرى : وضيه عليل... شاح زيته
 قطر الندى : بتحكى ولا كنت هناك
 مصرى : أنا الموعود أعيش فى الجنه وأتعذب و ألملم روى تغريبه
 فدا عينكى... صلاة حورس مع الضحكه تقيد عمر ك تقيد دربك
 تقيد بغداد
 قطر الندى : أنا يا مصرى هأمشيها خطا وبلاد... عشان ما أدخل
 برجلى القبر
 مصرى : تخشى القبر مش ممكن
 قطر الندى : قوم صلى على روى بلا سجد... شيل النعش... نزلنى دورين
 القلب وأخفينى عن الخفافيش... غنى غنوتك دايم بلحن هواك
 مصرى (بأسى) : يا حنينه يا عيني يا حنينه... ساكنه جوه الروح
 مفارقه عننا... ليل طواها تغيب ويحزن عمرنا
 ليل طواها تغيب وملعون السفر

- الفرقة (تغنى) سير سير سير سير يا نسيم الصبح بلغهم سلامى
سلام من فوق سلام تابع سلامى
سلام حليان حلى عود الريحانى
أمانه إن مُت يا جمع الأحبه
هاتوا من دمع عيني وغسلونى
هاتولى من بلاد الشام شقه
حرير أخضر وفيه كفونى
أبو الشوف : ليل طواها تغيب وملعون السفر
أربعين يوم والندى نازل على كل العباد . . . حنة حبيبتى
تدور صوانى فى قلبها مشنوق بلاد . . . اللى يغازل حزنها
بغناه الحزين . . . واللى بيوصف شعرها والليل طاويه
شاب ١ : واللى أتعجن علشان يلون خدها أو كفها آه
أبو الشوف : والقدم ماشى الخطا بيجر فى الجسم العليل . . . أحزن يا نيل
واياك تفيض وأنت مسافر م الحبش . . . غنى على كل السواقى
وبوح وجع . . . لحلاحى يا لحلاحى ونجيكم فى الأفراحى
- الأغنيه -
- الفرقة . . . لحلاحى يا لحلاحى ونجيكم فى الأفراحى
مطرب . . . مصرى الواد وسال دمه . . . خطف الروح بيقولوا عمه وفاته
يعيش وحده نواحى
- الفرقة . . . لحلاحى يا لحلاحى ونجيكم فى الأفراحى
مطرب . . . شرب البوظه الواد سفروت . . . هد حيطانك حتشبسوت
علشان مش عايزك ترتاحى
- الفرقة . . . لحلاحى يا لحلاحى . . . ونجيكم فى الأفراحى
مطرب . . . شق عيدان الفقر الجوع . . . يشرب وحده من الينبوع
وحط عليه البين صاحى
- الفرقة . . . لحلاحى يا لحلاحى . . . ونجيكم فى الافراحى
الراوى : شق الدراع فوق الدراع نرف السكات
الراويه : البنبت تحلم باللى فات تندم عليه
الراوى : أطفال بتسكن حينا
الراويه : بقوا مننا . . . والأصل فضل يا إما عار
الراوى : فى زمن وبيكونوا الصغار همه الألفه
- جمهور ٢ : يعنى القوالب نامت والنصاص قامت (ضحك جماعى)
الراوى : صح يا كابتن . . . انت فى وسط الناس كده فاهم
- جمهور ٣ : احنا كمان فاهمين (يدخل الى منطقة التمثيل) شوف يا عم أنت وأنا
عايشين وبنحاول نكون وسط الحكايه . . . الناس دى مليانه بكلام
الراوى : بس مش عايزين يقولوا . . . الخوف مكليش فى الحلق

- جمهور ٢ : (يتجه اليه) أبدأ يا ذوق . . . الهم واكل قلبها حبة المدارس
والجواز حتى السكن . الناس غلابه
- الراوى : الناس بشر تملك تحس بقلبها وتقوم تطالب بالحقوق فى زمن ما
بيكون الصغار همه الألفه
- أبو الشوف : (يدخل أبو الشوف فيخرج الجمهور)
ودا مش صدقه . . . ولا حتى كان من غير أوان . . . لما الأمل
ياخدك تطير زى الحمام أبيض وصافى وفجأه فيه غراب ينقرك
- الراويه : لازم تفر
- الراوى : ودا طبع الحر بيرفض ينضام
- أبو الشوف : المشكله مش فى الحمام
- الراويه : وتبقى فين المشكله
- أبو الشوف : المشكله فى قلوب لئام . . بتمدى إيدك ترفيعها وتقوم تطير تسقيكى
فى الفجر الجُحود . . . تعمل أسود ع اللى أنتشلها م الخبث
- الراوى : تبقى الحكايه فى العبث . . . لعب و عيال
- أبو الشوف : لا والله يا راوى الحكايه
- الراوى : فى ايه يا عم
- أبو الشوف : يعنى الزمان لما اختلف الباء بتركب ع الألف تصبح شقا
- الراويه : خش الحكايه وقول لنا من غير ما تتعب عقل تعبان م الرغيف
- الكورس : الفقر سيف قاطع فى حيل كل شريف
- الراوى : والرغيف اللى يزلك يا بن آدم ع الدوام
- الكورس : أيوه الرغيف اللى يزلك يا ابن آدم ع الدوام
- الراوى : قطر الندى ما أتغيرتش . . .
- الراويه : والقصه أصلاً انها بقيت أسيره فى إيد خسيس
- قطر الندى : نفس العريس . . . نفس العريس
- الكورس : والعشق طاهر والقليب ميال
- طاهر : ندهتى يا روح الوفا . . . صحتى فى غنوتى وسط الدموع
مالك فيه إيه ؟
- قطر الندى : جايب شوايل م الفلوس ملهاش عدد
- طاهر : العمر كام
- قطر الندى : العمر أكبر من حكاوى المجروحين
- طاهر : الوصف إيه ؟
- قطر الندى : (تضحك) هيكلم ومتشعلق فى شال ومربطينه فى العقال
(ضحك جماعى)
- طاهر : يعنى عجوز
- بردائوش : العمر مش سن وخلاص . . . القرش يجلى فى النحاس يصبح ذهب
يسبى العيون
- قطر الندى : ويخيل علينا . . . واللقمه تصبح مهرنا ياسى بردائوش

- برداؤوش : ما أنتى يا حلوه مفروض تفهمى ان إحنا لما نكون هنا وبنأخذ البنات
اللى زيك مع غير هدم ٠٠٠ والمدعو أبوكى يقبض القرشين
بنخفف الحمل شويه عليه
- قطر الندى : جاريه ف عبيدك مش كده
- برداؤوش : بصراحه مش عواز جوارى
- قطر الندى : طب جاي ليه ؟!
- برداؤوش : علشان بنات مصر الحلاوه تردنى وأرجع شباب حبه هزار ٠٠٠
حبه دلع أعيش كتير
- قطر الندى : يعنى أنتو بيطول عمركم وينقص للبنات موال عمرها
- الكورس : ترجع كسيره مطروده من عفو الأغا
- قطر الندى : وإن يوم طاوعها غلبها صرخت تدوخ
- الكورس : بين السفاره والموانى والسفر
- قطر الندى : يعنى يا مصر مش قادره تلمى فى لحمنا حتى فى قبور
- الكورس : قاسيه قوى القلب دا اللى كان بيحبنا مين جمده ٠٠ مين سوده
- قطر الندى : وبقيتى تاكلى فى العيال
- الأب : فيه إيه يا بت ٠٠٠ إنتى أتخبلتى
- الأم : ٠٠ ولا أتھبلتى يا نن عيني
- الأب : دا هيسعدك
- الأم : ياخذ بأيدينا من الهلاك
- الكورس : ما تصدقش
- قطر الندى : وأنا أبقي جاريه من الجوارى فى الققص
- الأب : البنات ومسيرها لكده
- قطر الندى : لك حق يا بابا ٠٠٠ الواحد بتسلم رموشها للحبيب وتفك قيد كل
المحرم ع العيون وبتكشفه ٠٠٠ الرغبة فى القلب الوداد مش
غصب بابا
- طاهر : وأنا الفقير اللى عجز عن حلمكم ٠٠٠ فين الوعود ؟
- الأب : كانت بتبكي وترتعش من غير فلوس
- طاهر : انت يا عمى اللى بتنقض عهدنا
- الأب : يا أبني العهود زى المشانق ٠٠٠ وانت بحلمك تنظلم
- طاهر : حليت فى عينك كل دنانير العجوز
- الأم : يا أبني يجوز انك تضحي لفرحها
- برداؤوش : فعلاً يجوز
- طاهر : اسكت يا راجل يا عجوز (ضحك جماعى)
- ممكن يا خاله ٠٠ أنا أضحي لأجل سعدھا ٠٠ ودا حقھا ٠٠ أنا مش
مخالف بس إني أضحي وهى تنباع أبقي خاين ٠٠ أبقي فرطت فى
كرامتى ودم أبويا
- الأم : ليه دم أبوك هو أنقتل ؟!

- الأب : أيوه صحيح ٠٠٠ إيه دخل أبوك يا أبني بموضوع زى دا
قطر الندى : أسكت يا طاهر ٠٠٠ أرحم عنيك وبلاش ألم ٠٠٠ لسه وهيصادفك كثير
- طاهر : بس السؤال دايماً غريب محتاج إجابة
قطر الندى : دولم ديايه بينشهو حتى الصباح
طاهر : مليون نهار جه واندفن فوق صدرها ٠٠٠ حسيتوا بيه ؟!
الأب والأم : أبدأ يا ولدى
طاهر : شوقتم عينها وهى بتنز المزار ٠٠٠ ولا أنتوا قولتم دول صغار ما بي فهموش
- قطر الندى : اسكت يا طاهر وبلاش تجدد فى الوجد
الكورس : شايله سنين وفى خطوتك باين تعب
مش قادره ع الحمل الثقيل ٠٠٠ النيل بيجرى من سنين
وما عدش بيفيض بالأمان ٠٠٠ النيل زمان
كات له عروسه بتحضنه يرجع سعيد
قطر الندى : من يوم ما راحت جدتى عند الخليفه ٠٠٠ النيل حزين
الكورس : النيل دا طاهر يا صبيه والعيال طاهرين
قطر الندى : حبات عيونى وسلوتى فى محبوسين
الكورس : الليل مجنزر فجرهم بقيود حديد
طاهر عنيد قادر على البوح يا صبيه
- الأم : خليه يطهر صدره حبه ٠٠٠ قول يا ضنايا
قطر الندى : يا أمه الوجد هيهده ليكوا محبتى وأشوف زوال
الأب : دا كلام عيال ٠٠ صلى صلى ع النبى
قطر الندى : ألفين صلاه يا أبا ع الحبيب
أبو الشوف : قلبك يطيب ٠٠ لو يوم تفضفض باللى فيه
جرح ودوا طعم الكلام اللى أتعجن جوه الحلق
ايه الحكاياه يا بنتى أحكى كملى
- قطر الندى : والدى يا شيخ
أبو الشوف : ماله المنيل زعلك
قطر الندى : أكثر كمان من الزعل
أبو الشوف : فيه ايه يا بنت ؟ ٠ قولى أنطقى
قطر الندى : مره يبيعنى لبردائوش بفلس ورق
أبو الشوف : وليه ابتدينا بالغرق يا ولاد كده
الأب : البنيت بتبالغ يا شيخ
الكورس : قطر الندى ما فى يوم بتكذب
كل اللى يملك شئونها بيبقى تاجر
قطر الندى : وحياة مقام سيدنا النبى يا شيخ حصل
أبو الشوف : عايزك توافقى ببردائوش

- قطر الندى : ويهد فى عنيه الحياه مع بردائوش يرضيك كده
أبو الشوف : لا ما يرضينيش ٠٠٠ بس أبوكى وحقه لازم هتطيعيه
مكتوب يا بنتى فى سكتك تلقى العذاب
قطر الندى : الصبر من فين املكه يا سيدنا قول
[و الشوف : ربك وخصك بالأمان مهما تدوقى يابنت من مر فى سنينك
طاهر : يا عمى
قطر الندى : بلاش يا طاهر
الآب : سيى الجدع وما تحرجهوش
طاهر : تسلم يا عمى ٠٠٠ كبرنا شوفنا نفسنا وسط العيال ٠٠ فى ساعات
بنكتب ع الشجر قلب وأسامى ٠٠ وساعات بنرسم حلمنا فوق
السحاب ندارى نجرى فى الملاء وسط الزروع ٠٠٠ ألقاها هله من
بعيد لهطة قمر تفرش ضياها على البيوت ٠٠ بدر التمام ٠٠٠
وساعات أشوفها أتفرع ٠٠ فى فوق خدودها وقلبها حجر صوان
الكورس : حجر صوان
طاهر : أيوه ومليان بالجراد
الكورس : دولا العيال اللى بتعشق صباحها ؟!
طاهر : لأ ٠٠٠ دول كلاب واقفين هينشوا عمرها
الكورس : حدد كلامك وضح فى سكتنا الهدف
طاهر : فى الشرق حبه وفى الشمال وهناك بعيد فى الغرب
واقف جماعه من العيال المأجورين
الكورس : تقصد تقول الأمريكان
أبو الشوف : أيوه يا واد الأمريكان – فلفل وحبه فى الفلك
دايرين فى سكة واد لنيم ٠٠٠ صابغين عيونها بالانتظار
شيطان رجيم بيهد حيلها بكام حكايه من المزيف
الأرض تنشف والسكه تبدل الاختلاف
طاهر : والله يا عم أنت الحكايه ما بين اديك
أبو الشوف : طواف وباركب فى الحكاوى وأنطلق وأبصر الشوف العمى
الكورس : القصد ايه
أبو الشوف : القصد فيكوا ومنكم يطلع نهار يحرس عنيتها وضلها ٠٠٠ تبقم
عيدان تحرق فى بوم متربصين
الكورس : نشوى فى كل الكدايين وتعود لنا قطر الندى طهر وعفاف
الآب : ما تصلوا بينا ع النبى " الأغنيه "
المطرب : أنا بأستعين بأسم المعين الواحد الفرد الصمد
الفرقه : الواحد الفرد الصمد
المطرب : واحد حلیم واحد كريم واحد مقسم الأرزاق واحد ولا ينسى أحد
الفرقه : واحد ولا ينسى أحد (الى نهاية الأغنية)
قطر الندى : فتح القبول للبردائوش كان السبب فى اللى احنا فيه

- شباب ٣ : طليتي ليه من وسطنا
قطر الندى : علشان فى عودك ينطلق بكره الجميل
شباب ٤ : وازاي جميل وانتى أرتضيتى ببردائوش
قطر الندى : الفقر ممكن يجبرك على شىء ماترضاش يوم عليه
الراوى : هذا الذى هز الحكايه فوق كتاف كل البنات
الراويہ : طلعت صلاة المغرمين وسط الحارات
شباب ١ : بدر البدور بنت حارتنا
شباب ٢ : ومشمشة البنت جارتنا
شباب ٣ : وست أبوها وسيدة وعيال شفيح
شباب ٤ : الكل كانت زفته هيصه وفرح
شباب ٥ (فى اداء فرعونى)
لا تسرفوا فى الوجع ٠٠٠ لا تسرفوا فى الشموع
من أجل بكر اللي جاي ٠٠٠ قدموا القرابين
فتاه ١ : أمون رع ٠٠٠ أتون
الكورس : أمون رع ٠٠٠ أتون
الراوى : والكل صلى من سكات
الكورس : حنة عنيك لا تزال الضى ٠٠٠ محروس فى عمرك وأنت متمزع
على شط روحك
فتاه "ايزيس" : ولدى بدمك حنوا عمرى وفوق كفوفى بيحرقوك ٠٠٠ حورس
سقاك العشق للضى العذاب
الكورس : غيب ٠٠٠ دا الغياب مكتوب عليك والقصه لسه مكرره
شباب ١ : فى البير رموك يا ضى طالع من حبابى العين
فتاه ٢ : طفوا الطريق والضلمه شبعت م العيال
الكورس : قطر الندى كانت فى أنات الجعان همس وهسيس
ومفيش عريس تكشف له يوم عن سرها
شباب ١ : الكل غاصب
الكورس : لساها واقفه بتتنظر نبض الحروف مليون لسان
(يدخل الراوى فتعود المجموعه الى الدائرة)
الراوى : مات بردائوش
الراويہ : وأتبشبت كل الوشوش
الراوى : والعزم أصبح فوق سواعد طيبه
شباب ٥ : يعنى الوشوش أتغيرت
الراويہ : أيوه الوشوش أتغيرت
شباب ٢ : يعنى القفا بقى بدماغين
شباب ٣ : ولا الودان عبوها جاز
فتاه ١ : رتلين نولع فى الوحش
الراوى : لا يا حبيبي مش كده ولا عمرى شوفت زى دا

- شباب : بطيخ طرح من غير أوان ولا جابلنا بمعجزه م الخيانيين
- الراوي : اتقلبت فينا السنين والحال بقى معجون عوج
- الراوي : أعوج حال حتى الهرم
- شباب : ليه ٠٠٠ اعوج حالك يا هرم ؟
- الراوي : قلبوه ٠٠ من يومها صدق ما أتعدلش
- الراوي : ليه بتعدل والناس موافقة على العوج
- شباب ٢ : قولى نعمل ايه ؟
- الراوي : تواجه الناس الغلط وتصد فيه
- شباب ٢ : بس الغلط اكبر من الناس والقوى دايماً بيغلب
- الراوي : نفس الكلام دا قاله فلفل
- شباب ٣ : فلفل دا مين ؟
- الراوي : فلفل يا سيدى واد سقى ٠٠ كان ماشى فوق قلب البنيه بالعنب وسقاها خمر ٠٠ وسابها تايهه فى الطريق
- شباب ٦ : الأمر مش واخذ وضوح
- الراوي : ماهى ورث وارثه عن أبوه
- (ابو على) الشيخ (كفيف) الطين ومين راح يزرعه غير الولد والكل يملك ألف غيط لأجل الولد
- قطر الندى : يعنى الولد يلاقى فيا مبتغاه ٠٠٠ يملك فى أرض مش حلال
- سيد وسع : مين قال كده ع البنيه ياناس ٠٠٠ فلفل وقادر يملك زى البيوت
- فلفل : حق الورث ٠٠٠ مش بالشرع الشىء يتحل ٠٠٠ دا أنتى مكتوبه فى وصيه ٠٠٠ يعنى أملكك وتخشى عندى فى الحريم
- الشيخ أبو على : أبعد يا واد أنت وهى من الطريق ٠٠٠ فى الأمر شىء لازم افهمه ٠٠٠ مين بيتدى ؟!
- الفتيات ٠٠٠ : ما أنتاش خيالى يا ولا
- آه يا ولا
- ما أنتاش على بالى
- لا و البنى
- لو شوفت شعرى يا ولا
- آه يا ولا
- مرسوم على ضهرى يا ولا
- آه يا ولا
- راح تدفع مهرى يا ولا
- آه يا ولا
- ما أنتاش خيالى
- لا والنبي
- الشيخ أبو على : يعنى البنيه مش عاجبها الولا والمسأله بكده محلولة
- أمال ايه أصل المشكله
- الشباب (يغنى): يا ليله بيضه الليله دى
- لافرح وأكيد الأعادى
- هتكونى مراتى يا عروسه
- بالغصب و راح أخذ بوسه
- يا ليله بيضه الليله دى
- فضل المحلل : أنا جيت وقادر ع الحلال ٠٠٠ لو مشكله متشكله جوه الطلاق

- زاهيه : أنا بأنطلاق بأقبض وأفض المسألة
- غور ياد بعيد داخل علينا بحنجلك وبمنجلك لا فيه حريم مطلقه
ولا حتى زوج واقع فى أزمه تحلها
- فضل المحلل : أنتى كده دايماً مقطعه الأرزاق
- الشيخ أبو على : أبعد يا واد أنت وهى ٠٠٠ الأمر ليه فى حكمها ٠٠٠ قطر الندى
ايه عكرك
- وسع : مش حقها تبقى طليقه وشايفه نور
- الشيخ : مين أجرك أو وكلك ٠٠٠ أنت أسمك إيه ؟
- وسع : وسع يا بيه ٠٠٠ وكتافى دى من بردائوش راجل ولا كل الرجال
والمدعو فلفل زاد فى ماله من الحلال ٠٠٠ أصله دا باشا وقطر
الندى حنة بوغاشه يستاهلها
- الشيخ : على شط نيلها كام جدع دايب وراضى باللى بيه
- الكورس : مين حس بيه ولا حتى هيه
- وسع : حد اشتكالك
- الشيخ : العشق مش محتاج لشكوى يا غبى
- وسع : والله لو ما أنتاش كيف كنت ضربتك
- الشيخ : (يدخل عليه) أضرب يا واد ٠٠٠ أضرب ماهو أنت م الزمن الملعون
تلقاك فى أصلك سرسجى ٠٠٠ مشرط يجز فى الرقاب
- وسع : ليه كل دا ٠٠٠ ؟ أنا أكل عيشى وبأقنه وأقبض فلوس
- الشيخ : أنتم خلاص يا أبني أفتريتوا ٠٠٠ ولأصلكم يا واد نسيتموا
وبقى انتماؤكم لأجنبى ٠٠٠ فلفل وحنضل باقى إيه ؟
- قطر الندى : أنتم خلاص ما بتملكوش حتى الحيا
- الشيخ : ما هو كل عاشق بيدسوه تحت الجزم ٠٠٠ بغداد يا قطر ممزعه
بين الطوائف والغيلان
- قطر الندى : بغداد دى كانت حاضره لكل العيون ٠٠٠ جواها علم وموعظه
وأماج حكاوى علمت كل العصور ٠٠٠ وأنا كنت فيها
السيدة عند الخليفة اللى أتقتل
- الشيخ : يعنى الخليفة والرئيس لقيم معاها حتفهم
- قطر الندى : قول شنقهم ٠٠٠ زى أنا ٠٠٠ بيحاول العقل الغبى ربطى بقيود
- الكورس : أبداً يا غاليه ما يقدروا ٠٠٠ إحنا الأسود واقفين بنحرس محملك
وإن روحنا فى النار لأجل رمشك ما تخافيش ٠٠٠ فيه ألف عاشق
منتظر قابض على زند السلاح ويموت شهيد
- الجرف : يا جماعه لازم ننعدل ونسيينا بقى من دا البكا ٠٠٠ عايزين فرح
- الشيخ : مين فينا قالك إننا عاشقين نواح
- الجرف : نور الصباح عايز عقول تحركه ٠٠٠ وتشده وبأسلوب جديد
- قطر الندى : طب دلنا ٠٠٠
- الجرف : ننسى بقى حكاية الخليفة ونخش جوه العولمه

- الشيخ : يعنى يا ولدى بتدلنا نروح للعوالم (ضحك جماعى) فيه ايه يا واد أنت وهو ٠٠٠ بتضحكوا على كلمتى ٠٠٠ صحيح عقول متخلفه
- شاب ١ : ممكن تقول الفرق بين كلمة عوالم والمعلم عولمه
- الشيخ : أقدر يا واد أنت مفكر إنى واحد مدعى أو صك مخه بجوز جزم
- شاب ٢ : طب قول يا سيدنا
- الشيخ : الفرق بين لون النهار وهجوم ضلام داخل عليك ٠٠٠ تفضل تدارى فى نور عنيك وتكون كفيف ٠٠٠ مش زى طبعاً
- شاب ٣ : إزاي يا شيخ
- الشيخ : زى الذباب بتحركه بس الغريزه وملهش شوف ٠٠٠ سيدنا النبى قايل علينا من زمان كثره وملهاش أى قيمه
- شاب ٢ : برضه ماردتش السؤال
- الشيخ : علشان ما مخك ضلموه جوه الشوال ٠٠٠ تاكل فى فول وبه العلف ونبيع عجول
- قطر الندى : جابوب يا سيدنا
- الشيخ : علشان عيونك راح أقول
- الكورس : قول
- الشيخ : العوالم جمع عالم فى اللغة أوحتى عالم وبيجمعوها علماء
- الكورس : ماء ماء (ضحك جماعى)
- الشيخ : ايه يا غنم كلامى صعب ولا ايه ؟
- الكورس : لا سهل جداً بس كمل ٠٠
- الشيخ : وفى فهمكم كلمة عوالم تعنى قال الرقاصين
- فناه ٣ : بتقول ايه ؟
- الشيخ : رقاصين (يقوم بالرقص) رقاصين ٠٠٠ (ضحك جماعى)
- (يضحك الشيخ) الله يسامحكم هزيتوا شيبتي بضحكم ما هو دا زمانكم كله عرى وشخلعه ٠٠ أما المعلم عولمه أسأل عليه
- يا ولدى أمك ٠٠
- شاب ١ : وما لها أمى بالكلام
- الشيخ : ليه يا ولد ٠٠٠ مش هى اللى ربنتك
- الكورس : أيوه صحيح ٠٠٠ مش هى اللى ربنتك
- الشيخ : سهرت عليك ومحبتك مزروعه نور ٠٠ خنقة الخضار لما غلى وأبوك فى بيتكم قعدوه قال ع المعاش
- شاب ١ : باعوا المصانع والشطوط بقيت لأصحاب الفلوس
- الشيخ : أهى هى دى يا أبنى معانى العولمه
- عمار (يدخل) : أنت هنا يا شيخ وأنا دايع عليك
- الشيخ : عمار أكيد ٠٠ فين يا ولد من وسط دول
- عمار : أنا لسه حاضر من هناك عند العروسة اللى أنت قلت لأمها
- الشيخ : ما هى واقفه أهى

- عمار : قطر الندى
قطر الندى : عمار أكيد... لساہ بيحكى عن طباعك يا فتى
عمار : ويارب عندك ألتقى حتى القبول
قطر الندى : قلبى انفتح لك م اللى قاله سيدنا فيك
عمار : بس انت مالك... شاردہ ليہ... ہم فی عنیکى وضحکتک غابت کمان
قطر الندى : حسيتنى حالاً يا فتى
عمار : طبعاً يا غاليه إحكى قولى فسرى
قطر الندى : (تضحك) فلفل يا سيدى عايز ياخدنى فى ورث أبوه
زاهيه : سيبك يا بت من الكلام واختارى وحدك... دول لئام وكل هم فى همهم عقق اللجام
عمار : يا ست زاهيه الكلام فعلاً يخوف... عمر الجواز ما يكون بغصب
قطر الندى : مش ضمن تركه هيورثوها
روايح : ما بيختشوش... فلفل وأبوه سى بردائوش... نصبوا فى سوق بيع العبيد
عمار : أنتى يا غاليه محرره توبك شرف... اختارى وبكامل ارادتك
فلفل : أنا روحى وف قطر الندى
عمار : فلفل فارقنا... الحق مش عافيه ودراع
الكورس : أتجوز أمك
فلفل : لا يجوز
الكورس : اتجوز اختك
فلفل : لا يجوز... لا يجوز
عمار : قطر الندى أتجوزها أبوك... تبقى عليك محرمة
الكورس : تبقى عليك متحرمة
داهيه : إيه اللى يمنع... فلفل دا ممكن يخطفك ويدخلك قصر الحريم
وتلقى أورطه من الخدم وحرير كتير يشرح عيونك والطرح من كل صنف وتعيشى أيام الفرح بلا بهدله وقلة عقول
قطر الندى : دا الحلم فى عيون العبيد
الكورس : دا الحلم فى عيون العبيد
قطر الندى : أما الحرائر ما يلقوش غير نفسهم وسط البراح... حمامات تطير
تما لا الفضا حب وحياه
الشيخ : قيموا الصلاه يا مؤمنين قيموا الصلاه
فى الحلم نعشق عيونها... وفرحوها بالغنا قيموا الأفراح
الفرقه (تغنى) : صلوات الحنه : صلوات الحنه
ألعبوا يا شباب : لعب الحنه
صلوات الحنه
عم غريب : عقبال عنده

بيته قديم زرعه بورده

وينفش بابه بالحنه

صلوات الحنه

مصر الغاليه تعيش فى النور

تلقى جدع يملأها سرور

ويسيب أهل الناحيه تقول

مصر خلاص صبحت جنه

صلوات الحنه

الراوى : ويجنا فارد كام سؤال

الراويه : ويحط ع القلب العلل

الراوى : أستتر يارب ٠٠٠ فيه إيه يا ست ٠٠ جايبه إيه ؟

الكورس : صبرت كتير والقلب ملىان بالعلل

الراوى : من بين جوازها للخليفه ولحد مستر بردائوش

الكورس : وفات عليها القراقوش والمفتري ٠٠٠ والمعتدل والغزنوى

واللى ملاها بجعجه

الراويه : العاشقين كفروا بقيمة عشقها

أبو الشوف : حاسبى يا ست ٠٠٠ إلا سيرة الكفر حاسبى ٠٠٠ طول عمرهم

بيها مؤمنين ٠٠٠ العشق دين سنه ووضوء ٠٠٠ إياكى فكراها

المؤنث يا أسمك إيه ٠٠٠ الأميرة الطيبه مستغربه أحوال كتير

الراويه : فيه ألف خاطب ودها ٠٠٠ عروسه محتاجه العريس

أبو الشوف : لا يا ست ٠٠٠ وحيده محتاجه الونيس ٠٠٠ دا الوكسه دايماً بختها

شاب ١ : الأولانى كان خليفه وأتشنق (الكورس يردد)

فتاه ٣ : والثانى كان مرهون ذليل (الكورس يردد)

الراوى : والثالث الخفه الفصيح فاتها وهى مستباحه ومُهمله

كورس : فاتها وهى مستباحه ومُهمله

أبو الشوف : بس يا بت أسكت ياله ٠٠٠ قطر الندى بيهما قوت العيال

ضحك العيال وفرحهم

فناه ٤ : وهتاخذ إيه ؟

أبو الشوف : هتاخذ النور والأمل ٠٠٠ قنديل بيسرج ضيها وسط الضلام

شاب ١ : ازاي وهمه غرقانين وسط البلا

أبو الشوف : ماهى هى عارفه يا نور إن البنات فاتها الجواز ٠٠ والولد من يومه

متقيد سجين ٠٠٠ واقعه فى زمرة شياطين

شاب ٣ : حبه بيعيدوا فى الشيطان

فتاه ٥ : وحبه ضايعين فى الشوارع

شاب ٤ : وعيال بتحدف من بعيد فيها اللغم

فتاه ٢ : والعرف داير وسط ديك

شاب ٦ : والعائلات اللى بتشكى من الفلس بتزيد يا ساده فى المهور

أبو الشوف : قطر الندى جوه البيوت بتعانى من عجز وكنابه ومحزنه
شدم ف حيلها تشدكم فوق للضيا
الكورس أ : ٠٠٠ بنحلم بيكى يا غاليه ٠٠ نهار صافى وغيمه مطر ٠٠٠ بنحلم
بيكى وردايه وضحكايه وحض كبير ٠٠٠ تساوى بين محبيتك
بلاش غيمه يكون أسود وضى الضى حرمانا فى لحظه شوف
نشوف السكه نمشيها مع الأحلام ومش بس يا غاليه كلام بأيدنا
ننحت الصعبه تمدى خطوتين قدام
المجموعه ب : ٠٠٠ بلاش ننده على روحنا ٠٠ يرد الصوت ويسجننا ٠٠ ولاد
الكلب فوق يعلوا ويرموكى فى قلب قيود
الكورس : ٠٠٠ سواقى النيل ليه بتعيط ٠٠ وليه فى السكه نتخبط وجاى الغول
ولا بيرحم ولا بيعرف غير التضليل ٠٠ وقاصد ينهشك ياكلك
تخشى التركه يحكمنا كما بغداد ٠٠٠ يا أحلى بلاد تعالى نلعب الحنه
ونقتل رملك الأصفر دفا و رغيغ عشان حلمك بقلنا صلاه
بت يا سويسيه حضرى الصينيه
هاتى الحنه وعينيها بكره نتحنى بيها
بت يا سويسيه حضرى الصينيه
هاتى الحنه وكفايه يا مصر تكونى هوايا
وتحسى بضى الفرحة وتشوفى نور الحريه
بت يا سويسيه حضرى الصينيه
أحلم وياكى وأغنى وأشوفك عاشقه لفنى
وأحنا بنزرع شطوطك بالحب وبالملاغيه
بت يا سويسيه حضرى الصينيه

تمت

أحمد أبو سمرة

السويس يوم الأحد ٧ يناير ٢٠٠٧

ملحوظه :

لا يحق لأى أحد العبث فى هذا النص ولا التدخل بالحذف أو الإضافه إلا بأذن من المؤلف .